

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

11

T 3205/3142.82

江都縣志卷之十四

試江南揚州府江都縣知縣 陸朝陽

官編輯

人物志一

名賢一百三十四人

漢召平廣陵人秦二年為陳勝徇廣陵未下問陳勝敗

走秦將章邯且至迺渡江矯陳王令拜項梁為楚上柱

國曰江東已定急引兵西擊秦梁迺以八千人渡江而

西 漢書

謝瑜字季節廣陵人高祖父廣陵靖王父辯清河太守

江都縣志卷之十四

哈佛大學漢和
圖書館珍藏印

試江南揚州府江都縣知縣臣陸朝璣奉

旨編輯

人物志一

名賢一百三十四人

漢召平廣陵人秦二年爲陳勝徇廣陵未下聞陳勝敗
走秦將章邯且至迺渡江矯陳王令拜項梁爲楚上柱
國曰江東已定急引兵西擊秦梁迺以八千人渡江而
西漢書

劉瑜字季節廣陵人高祖父廣陵靖王父辯清河太守

江者果元
瑜少好經學尤善圖讖天文歷算之術州郡禮請不就
延熹八年太尉楊秉舉賢良方正至京師瑜上書陳事
言中官邪孽女嬖令色宜遠邪佞之人放鄭衛之聲於
是特詔召瑜問災咎之徵指事案經讖以對執政者欲
令瑜依違其辭而更策以他事瑜復悉心以對八千餘
言有切於前竟不能用拜爲議郎及大將軍竇武欲大
誅宦官引瑜爲侍中同謀畫武敗瑜並被殺宦官悉焚
瑜所上書以爲訛言子琬傳瑜學明占候舉方正不行
後漢書

袁綏廣陵人爲漢太傅掾廣陵太守張超討董卓以綏

領廣陵事子廸單貧有志與陳國陳融陳留濮陽逸沛
郡蔣纂皆就吳丞相陸遜弟瑁遊處廸孫暕字思光作

獻帝春秋

魏志

三國陳矯字季弼廣陵人本廣陵劉氏爲外祖陳氏所
養因而改焉避亂江東及東城辭孫策袁術之命還本
郡太守陳登辟爲功曹時廣陵爲孫權所圍登令矯求
救於曹操矯說操操乃遣兵赴救吳軍旣退操辟矯爲
司空掾除相令歷魏郡西部都尉遷魏郡太守時繫囚
千數至有歷年矯悉覽罪狀一時論決丕立封高陵亭
侯遷尙書令丕子叡立進爵東鄉侯一日叡猝至尙書

江都縣志 卷之十四 人物志 二
門矯跪問曰陛下欲何之曰欲案行文書耳矯曰此是
臣職分非陛下所宜臨也若臣不稱其職請就黜退叡
慙回車其亮直如此加侍中光祿大夫遷司徒卒諡貞
侯 魏志

陳本矯子也歷位郡守九卿所在操綱領舉大體能使
羣下自盡有統御之才不親小事不讀法律而得廷尉
之稱優於司馬岐等精練文理遷鎮北將軍假節都督
河北諸軍事薨子粲嗣 魏志

張紘字子綱廣陵人舉茂才公府辟皆不就避難江東
孫策表爲正議校尉策遣紘奉章至許留爲侍御史孔

融等皆與親善操聞策卒欲因喪伐吳紘諫以爲乘人
之喪非古義不如因而厚之操從其言卽表權領會稽
太守操欲令紘輔權內附出爲會稽東部都尉後權以
紘爲長史紘建計宜都秣陵權從之令還吳迎家道病
卒 吳志

吳書曰權每有異事密計及章表書記常令紘與張
昭撰作初琅琊趙昱爲廣陵太守察紘孝廉昱後爲
笮融所害紘在東部遣主簿至琅琊設祭并求親戚
爲之後權聞而嘉之子元官至南郡太守尙書元子
尙孫皓時爲侍郎

江都縣志
華融字德蕤廣陵江都人祖父避亂居山陰葢山下詩
皇象亦寓居山陰吳郡張溫求就象學欲得所舍或告
溫曰葢山下有華德蕤者雖年少有令志可舍也溫遂
止融家與朝夕譚講溫後爲選部尙書乃擢融爲太子
庶子遂知名顯達融子譚黃門郎次子譚晉秘書監吳志
閔鴻廣陵人仕爲吳尙書與丹陽薛兼紀瞻吳郡顧榮
會稽賀循齊名號爲五俊吳志

按吳志稱鴻見陸機兄弟奇之曰此兒若非龍駒
當是鳳雛諸志引之以爲二陸稱鴻語殊誤

范曄字孝敬廣陵人爲侍中出補武昌左部督治軍整

頓孫皓移都甚憚之詔曰曄勲德俱茂朕所敬憑宜登
上公以副衆望以爲太尉曄自恨久爲將遂託老耄軍
士戀之舉營爲之隕涕竭忠知己之君纏綿三益之友
時人榮之著論二十篇名曰矯非鳳凰三年卒子耀嗣
吳志

徐彪字仲虞廣陵人仕吳爲選曹郎夙與張溫同意數
交書疏聞問往還吳志

晉陳騫字休淵魏司徒矯子本廣陵人起家尙書郎遷
中山安平太守並著稱績後封安國亭侯又進爵廣陵
侯復封郟侯咸寧初遷太尉轉大司馬言胡烈牽弘皆

江都縣志 卷之四 四
勇而無謀強於自用非綏邊之材二人後果失羗戎之
和皆被寇喪沒征討連歲僅而得定騫少有度量含垢
匿瑕所在有績累處方任爲士庶所懷年踰致仕求入
朝因乞骸骨詔遣侍中敦諭固請許之位同保傅在三
司之上賜以几杖不朝安車駟馬以高平公還第禮之
甚重聽乘輿上殿薨年八十一贈太傅諡曰武子輿嗣
晉書

劉頌字子雅廣陵人廣陵厲王胥之後也父觀平陽太
守頌少能辨物理文帝辟爲相府掾武帝踐阼拜尙書
郎典科律申冤訟累遷中書侍郎咸寧中詔頌與散騎

郎白袞巡撫荆揚以奉使稱旨轉黃門郎遷議郎守廷
尉在職六年號爲詳平轉河內太守郡界多公主水碓
遏塞流水爲害頌表罷之百姓獲其便利尋除淮南相
在官嚴整甚有政績又上疏論律令事爲時論所美轉
吏部尙書卒諡曰貞 晉書

華譚字令思融子好學不倦爽慧有口辯揚州刺史周
浚引爲從事史太康中刺史嵇紹舉譚秀才至洛陽武
帝親策之時九州孝秀策無逮譚者除郎中遷太子舍
人爲鄆城令過濮水作莊子贊永寧初爲郟令傾心撫
卹甚有政績再遷廬江內史加綏遠將軍時石冰之黨

陸珪屯據諸縣譚遣司馬褚敦討平之以功封都亭侯
食邑千戶建興初元帝命爲鎮東軍諮祭酒譚博學多
通乃著書三十卷名曰辨道上牋進之帝親覽焉轉丞
相軍諮祭酒領郡大中正久之加散騎常侍以疾辭卒
於家贈光祿大夫子化字長風討汲桑戰沒

晉書

戴淵字若思廣陵人舉孝廉累轉振威將軍以討賊有
功賜爵秣陵侯出爲征西將軍都督兗豫幽冀雍并六
州諸軍事假節加散騎常侍鎮壽陽至合肥而王敦舉
兵詔追淵還鎮京都進驃騎將軍與右衛將軍郭逸分
道築壘於大桁之北尋石頭失守淵與諸軍攻石頭王

師敗績遂率麾下百餘人赴宮受詔與百官公卿於石
頭見敦敦問曰前日之戰有餘力乎淵曰豈敢有餘但
力不足耳又曰吾此舉動天下以爲何如淵曰見形者
謂之逆體誠者謂之忠敦笑曰卿可謂能言俄遣鄧嶽
繆垣收淵害之淵素有重望海內之士莫不痛惜賊平
贈右光祿大夫儀同三司謚曰簡

晉書

戴邈字望之淵弟少好學尤精漢史才不逮兄而儒博
過之弱冠舉秀才尋遷太子洗馬出補西陽內史永嘉
中元帝版行邵陵內史丞相軍諮祭酒上疏請興禮樂
帝納焉尋代劉隗爲丹陽尹王敦作逆加左將軍及敦

得志淵遇害邈坐免官敦誅後拜尚書僕射卒贈衛將軍諡曰穆

晉書

高嵩字茂琰廣陵人父悝別有傳嵩少好學善史書司空何充爲揚州引爲主簿舉州秀才除太學博士初悝被黜及卒嵩自繫廷尉訟冤停喪五年不葬表數十上帝哀之聽轉侯爵拜中書郎黃門侍郎簡文帝輔政引爲撫軍司馬時桓溫擅威率衆北伐軍次武昌簡文患之嵩爲作書諭以禍福溫卽還鎮哀帝雅好服食嵩諫以爲非萬乘所宜後以公事免卒於家

晉書

南齊荀伯玉字弄璋廣陵人齊高帝鎮淮陰伯玉爲叅

軍高帝爲宋明帝所疑徵爲黃門侍郎深懷憂慮而無計得留伯玉教其遣數十騎入魏界安置標榜魏果遣游騎數百履行界上高帝以聞得復本任由是見親待時武帝在東宮專斷用事任左右張景真其伎人皆著御衣又白服乘畫舫艫坐胡牀觀者咸疑是太子內外祇畏莫敢有言伯玉密啓上收景真殺之愈見親信軍國密事多委使之時人爲之語曰十勅五令不如荀伯

玉命

南齊書

唐曹憲揚州江都人仕隋爲秘書學士聚徒教授凡數百人公卿多從之游於小學家尤邃自漢杜林衛宏以

後古文亡絕至憲復興煬帝令與諸儒撰桂苑珠叢規正文字又註廣雅學者推其該博藏於秘書唐貞觀中揚州長史李襲譽薦之以弘文館學士召不至卽家拜朝散大夫當世榮之太宗嘗讀書有奇難字輒遣使者問憲憲具爲音注援驗詳復帝咨尙之卒年百餘歲唐書來濟江都人護兒少子也字文化及之難濟以幼得免轉側流離篤志爲文章善議論曉暢時務入唐擢進士累官同中書門下三品封南陽縣男遷中書令高宗將以武氏爲后濟諫曰王者立后以承宗廟母天下宜擇禮義名家幽閒令淑者副四海之望稱神祇之意武氏

立銜之謾言濟等忠鯁請加賞慰帝示濟等濟益懼顯慶初兼太子賓客進爵爲侯帝從容問馭下所宜濟以省徭役爲對時山東役丁歲數萬人又議取庸以償雇紛然煩擾故濟對及之二年兼詹事尋坐褚遂良事貶台州刺史久之徙庭州龍朔二年突厥入寇濟總兵拒之謂其衆曰吾嘗絀刑網蒙赦死今當以身塞責遂不甲胄而馳敵歿焉年五十三贈楚州刺史濟異母兄恒上元中爲黃門侍郎同中書門下三品父本驍將而恒濟俱以學行稱相次知政事唐書

上官儀字游韶本陝人父弘爲隋江都宮副監因家焉

江都縣志
大業末弘爲將軍陳稜所殺儀幼藏匿獲免因私度爲沙門涉獵經史善屬文貞觀初舉進士太宗聞其名召授弘文館直學士遷秘書郎時太宗雅好屬文每遣儀視草預撰晉書轉起居郎高宗嗣位遷秘書少監龍朔二年加銀青光祿大夫西臺侍郎麟德元年上以武后專作威福密召儀議之儀奏皇后專恣海內失望宜廢之以順人心上命草詔左右奔告后后詣上自訴上曰此上官儀教我耳后使許敬宗誣奏儀與宦者王伏勝及故太子忠謀大逆下獄死籍其家子庭芝歷任周王府屬與儀俱被害庭芝有女爲中宗昭容侍草制誥追

贈儀爲中書令秦州都督楚國公庭芝黃門侍郎岐州

刺史天水郡公以禮改葬

唐書

李善江都人雅行博學淹貫古今人號爲書簏顯慶中累擢崇文館直學士兼沛王侍讀爲文選註六十卷敷析淵詳表上之賜賚優渥除潞王府記室叅軍轉秘書郎乾封中出爲涇城令坐與賀蘭敏之善流姚州遇赦還居汴鄭間教授諸生多自遠方至傳其業爲文選學

唐書

李邕字太和善子也少謁李嶠自言讀書未徧願一見秘書嶠曰秘閣萬卷豈時日能習耶邕固請乃假直秘

江都縣志 卷之十四 九
書未幾辭去嶠試問奧篇隱帙了辯如響嶠歎曰子且名家武后朝嶠爲內史與張廷珪薦邕可任諫爭召拜左拾遺御史中丞宋璟劾張昌宗等反狀武后不應邕立階下大言曰璟所陳社稷大計當聽后色解爲可璟奏中宗時召拜右臺殿中侍御史彈劾任職遷戶部員外郎明皇卽位爲御史中丞左遷括州司馬起爲陳州刺史貶遵化尉徙澧州司馬開元中起爲括州刺史復坐誣枉且得罪上識其名詔勿劾後歷淄滑二州刺史邕蚤有名重義愛士久斥外不與士大夫接及入朝人傳其眉目瓌異阡陌聚觀後生望風投謁門巷填溢後

以讒媚出爲汲郡北海太守天寶六載宰相李林甫忌邕名盛因傅以罪遣羅希奭就郡按邕杖殺之代宗時贈秘書監邕爲文長於碑頌官雖屢黜不進而天下慕其名盧藏用嘗謂邕如干將莫邪難與爭鋒但虞缺折耳

唐書

李鄴字建侯邕從孫建中間登進士第又以書判高等補秘書省正字李懷光辟至幕府累擢監察御史懷光反河中鄴與高郢刺賊虛實及所以攻取者白之朝德宗手詔褒答懷光覺嚴兵召詰鄴詞氣不撓懷光囚之及河中平馬燧破械致禮表佐其府以言不用罷歸洛

中召爲吏部員外郎元和後拜淮南節度使王師討蔡
鄴以兵二萬分壁鄆境貲餉不仰有司後以吐突承璀
薦召拜門下侍郎同中書門下平章事鄴不喜由宦官
倖進至京師引疾固辭改戶部尚書俄檢校尚書左僕
射兼太子賓客分司東都以太子少傅致仕卒贈太子
少傅謚曰肅

唐書

王播字明敷其先太原人父恕爲揚州倉曹參軍遂家
江都之瓜洲貞元中播舉賢良方正異等補盩厔尉歷
遷京兆尹時禁屯屬韃佩劍姦人冒之剽劫又貴戚家
馳獵近郊爲民害播一切禁止盜無所匿憲宗以爲能

進刑部侍郎領諸道鹽鐵轉運使長慶初召爲刑部尚
書復領鹽鐵進中書侍郎同中書門下平章事出爲淮
南節度使仍領使職浚十

舊唐書
作七

里港以便漕民賴其

利太和元年入朝拜左僕射復輔政累封太原郡公卒

贈太尉謚曰敬

唐書

王起字舉之播弟貞元中擢進士與播並舉賢良方正
異等元和末累遷中書舍人數上疏規諫穆宗畋遊拜
禮部侍郎宣武押牙李芥叛起與播俱上疏請詔王智
興討之卒定其亂以戶部尚書判度支靈武邠寧多曠
土奏爲營田以省餽輓歷河中節度使方蝗旱粟價騰

江都縣志 卷之四 十一
踊起下令家得儲三十斛斥其餘以市否者死神策士
怙勢不從宣於法由是層積咸出民賴以生授檢校尚
書右僕射爲山南東道節度使濱漢多塘堰聯屬民弗
完治起至部修復遂無凶年會昌中命典貢舉進尚書
左僕射封魏國公凡四舉士多知名人服其鑒卒年八
十八贈太尉謚文懿起性友悌居播喪哀戚加於人尤
嗜學非寢食不輟廢 唐書

王龜字大年起之子性高簡武宗知其名以左拾遺召
不赴崔璵觀察宣歙表爲副龜樂宛陵山水從之咸通
中改太常少卿同州刺史牙將白約素暴橫嘗譁言月

廩薄以動士心爲亂龜捕殺之人皆震慄徙浙東觀察
使卒贈工部尚書子蕘力學有文辭以鐸當國不貢進
士終右司員外郎 唐書

王式起之子以廕爲太子正字擢賢良方正累遷殿中
侍御史大中中爲晉州刺史會河曲大歉民流徙他州
式勞卹之活數千人以善最稱徙安南都護初交趾數
有變懼式威不自安譁曰黃頭軍將度海襲我矣相率
夜圍城合譟請都護北歸我當抗黃頭軍 黃頭軍忠武成卒也式

徐被甲引家僮乘城責讓叛者走翌日盡捕斬之初容
管災歉不歲貢式始上輸大犒宴軍中歸質外蕃而占

江都縣志 卷之四
城直臘慕義悉入獻亦還所掠王民寧國劇賊仇甫亂
明越觀察使不能討宰相選式徃代式發聞賊用騎兵
乃閱所部得吐蕃回鶻遷隸數百發龍陂監牧馬起用
之集土團諸兒爲向導擒甫斬之餘姚民徐澤專魚鹽
之利慈溪民陳城冒名仕至縣令皆豪縱州不能制式
窮治其姦皆榜死咸通三年徐州銀刀軍亂以式檢校
工部尚書徙武寧節度使視事三日悉以計誅亂兵終
左金吾大將軍 唐書

王鐸字昭範式之子會昌初擢進士第累遷御史中丞
中和元年拜同平章事二年黃巢陷長安鐸請討賊乃

以爲諸道行營都統移檄天下時諸將環賊莫敢先發
鐸檄至號令肅然將士皆奮巢勢日蹙宦者田令孜料
賊必破欲功出北司乃構鐸於帝罷爲檢校司徒義成
節度使鐸功幾就而以讒見奪然卒因其勢收復京師
四年徙義昌節度使過魏州樂從訓利其輜重侍妾伏
兵高雞泊劫殺之以遇盜聞朝廷不能詰天下痛惜焉
唐書

李磎字景望鄜之孫也大中末登進士累遷戶部郎中
分司東都劾奏內園使郝景全不法事黃巢陷洛磎挾
尚書八印走河陽時留守劉允章爲賊脅遣人就磎索

印拒不與襄王之亂碓流寓淮南高駢受爲命碓苦諫
不納入爲翰林學士辭職歸乾寧元年召進禮部尙書
同中書門下平章事崔昭緯素疾碓諷劉崇曾劾之下
遷太子少傅復爲李茂貞等所論又罷爲太子少師上
猶注意復用之及王行瑜韓建擁兵闕下列碓罪殺之
都亭驛行瑜誅詔贈司徒謚曰文碓嗜學家有書至萬
卷世號李書樓所著文章及注解諸書傳甚多

唐書

五代嚴可求同州人隨父遷江都少爲吳幕僚吳王歿
張顥欲自立厲聲謂諸將曰軍府誰當主者三問莫應
可求前密啟曰方今四境多虞非公王之不可然今日

則恐太速顥默然可求急趨出書一紙內袖中麾同列
往使宅賀衆莫測旣出教宣之乃吳王母史太夫人教
也大略言隆演當次立諸將宜無負楊氏辭旨激切顥
氣色皆沮以其義正不敢奪吳王隆演乃得立顥知爲
可求所賣夜遣盜刺之可求度不免請爲書辭府主盜
執刀臨之可求操筆無懼色盜粗能識字見其辭氣忠
壯曰公長者吾不忍殺遂舍之去南唐時歷遷門下侍
郎尙書右僕射同平章事

十國春秋

嚴續字興宗可求子以父廕補千牛備身遷秘書郎南
唐主以女妻之官兵部侍郎進尙書及宋齊邱專國公

卿多附之惟續持正不爲屈拜中書侍郎兼三司使終
鎮海軍節度使謚曰懿初續以少貴倦學因力教羣從
子弟砥礪儒業子孫舉進士者累累不絕晚歲尤屈身
下士壽春人劉奐性方言直續薦爲監察御史起居舍
人時論善之

十國春秋

張訓廣陵人遷清流勇悍多膽畧時人謂之大口張吳
王行密據合肥訓往見甚歡授親兵擊舒州盜吳迥等
揚州之役訓潛入城滅餘火得穀數十萬斛以賑饑民
明年取常州復屯安吉斷孫儒糧道有功授常州刺史
遷淮海都遊奕使轉尙書左僕射未幾王茂章破密州

以訓爲密州刺史茂章爲汴兵所追解兵去諸將請焚
城大掠而歸訓不可乃封府庫植旌旗於城上自以精
兵殿後頃之汴將王檀來攻望見旗幟不敢逼訓竟全
軍還卒贈太傅清河郡公

十國春秋

高郁廣陵人楚王馬殷爲湖南留後以郁爲謀主署都
軍判官初殷畏淮南荆南廣南之強議以金帛結之郁
曰莫若上奉天子下撫士民訓卒厲兵以修霸業於是
殷始修貢京師開平時郁復勸殷令民得自造茶以通
商旅而收其算歲入凡萬萬計命民輸稅者用帛代錢
機杼遂繫於吳越殷地大力完得邀封爵以與諸鎮抗

者郁謀居多而內外疾郁功者讒郁之短殷子希聲矯令殺郁是日大霧四塞殷怪之吏以狀白殷拊膺大慟曰吾老耄使勛舊橫罹冤酷吾亦不久於此矣

十國春秋

李貽業吳起居郎李戴子也戴卒官因家廣陵貽業事南唐爲翰林學士李主昇殂大臣欲奉宋后臨朝命書侍郎孫忌草遺制貽業曰此姦人所爲也大行嘗謂婦人預政亂之本也安肯自爲此若果宣行貽業當對百官裂之於是臨朝之議遂寢李主璟語貽業曰疾風勁草於卿見之保大中以兵部侍郎卒謚曰簡

陸游南唐書

李德誠廣陵人幼從吳武王征討積功至江南馬步軍

使與諸將圍安仁義於潤州諸將每見仁義臨城皆嫚罵德誠獨否及城破仁義操弓矢坐城上衆莫敢近德誠至仁義謂之曰汝見我獨不失禮今以爲汝功卽擲弓矢就執武王拜德誠潤州刺史歷撫虔洪三鎮節度使平南大將軍中書令李主受吳禪以佐命拜太師封南平王進封趙王自洪州入覲命宮人迎勞於路百官班謁於門朝堂設幄爲具每有大議遣執政就第諮問然爲人謙恭沉厚終始如一卒謚忠懿子二十八人皆右職而建勲爲相建封爲將相無阿黨將死國事君子善之

陸游南唐書

李建勳字致堯德誠第四子少好學能屬文尤工詩家世將相然杜門不預世事所與交皆寒畯裘馬取具而已李主昇鎮金陵預禪代之策拜中書侍郎同平章事璟嗣立以開國元勳又聯姻戚尊遇之與宋齊邱埒出爲撫州節度使建州之役諸將無復紀律建勳請官出金帛贖俘掠還其家召拜司空以司徒致仕賜號鍾山公營別墅於山中放意泉石曰吾自知不壽欲求數年閑適耳疾革遺令勿封樹立碑遺他日毀斷之旣贈太保謚曰靖

陸游南唐書

何敬洙廣陵人軀貌短陋而趨捷有力李主昇以爲金

陵裨將累遷天威軍都虞侯破西巖延平下建州除楚州刺史嘗從數人親出里巷察人疾苦吏之苛刻無不知之每坐廳事與賓客譚宴民有白事者隨其所言親加剖析無不厭服及移鎮鄂州周師入淮南詔移郭外居人入城爲備敬洙不從乃背城除地爲戰場曰職當効死於此安能閉門自困也後以勳舊拜上將軍奉以上公之秩卒年七十七

馬令南唐書

馮令頽廣陵人事本郡爲軍吏署歙州鹽鐵院判官裨將樊思蘊作亂燒營火及令頽第叛卒皆釋兵救火其得人心如此子二延已延魯

馬令南唐書

潘祐一作佑廣陵人氣宇孤峻不營貲產文章瞻逸尤敏

於議論以秘書省正字直崇文館輔後主於東宮後主

卽位遷史館修撰改知制誥祐極論時政無所迴避後

主手札敦喻之祐七表不止因請休官遠去乃徙祐專

知國史悉罷其職時江南衰削祐所上諫疏有陰陰如

日將暮之辭後主惡之又其所薦黜與時輩不協因誣

以他事劾祐祐自刎母及妻子徙饒州馬令南唐書

徐鍇字楚金廣陵人與兄鉉同有大名第進士累遷屯

田郎中知制誥集賢殿學士改官名為內史舍人兄弟

俱叅近侍後主嘗命鍇序其文集而鍇著質論十餘篇

後主札批其首儒者榮之及金陵在圍中病卒謚曰文

著有說文通釋方輿記古今國典賦苑歲時廣記及他

文章數百卷馬令南唐書

志云鍇與兄鉉相友睦常共用墨一圭弟馬未歸

兄馬不肯茹草兄出亦如之鉉以諫被逐鍇思念

涕泣至失心母請於李主李主哀之召鉉還鍇病

昏瞽不識人猶自記兄背有黑痣子發衣驗之遂

抱持噬其痣號哭幾至氣絕

按鍇應列鉉之次乃鍇始終南唐未嘗入宋鉉則

從主歸命為宋初名賢朝代之分非倒置也

江都縣志 卷之四
宋徐鉉字鼎臣廣陵人十歲能屬文不妄游處仕南唐
李煜爲吏部尚書宋師圍金陵煜遣鉉求緩兵煜以鉉
旣行欲止上江援兵勿令東下鉉曰江南所恃者援兵
奈何止之煜曰方求和解而復決戰豈利於汝乎鉉曰
要以社稷爲計豈顧一介之使置之度外可也煜泣而
遣之及至雖不能緩兵而入見辭歸禮遇皆與常時同
及隨煜入覲太祖責之聲甚厲鉉對曰臣爲江南大臣
國亡罪當死不當問其他太祖歎曰忠臣也令爲太子
率更令直學士院從征太原軍中書詔填委鉉援筆無
滯辭理精當時論能之累遷左常侍卒年七十六鉉精

小學好李斯小篆臻其妙隸書亦工有文集二十卷新
定說文質疑論稽神論 宋史

陸游南唐書云鉉後與湯悅同奉勅撰江南錄至
於李氏亡國之際不言其君之過但以歷數存亡
論之君子有取焉

潘及甫字憲臣江都人博通經史厲志文行聞胡瑗倡
學於湖往從之瑗見其文喜曰非諸生比也遂補學職
妻以女弟慶曆中與兄希甫同登進士爲懷仁尉筠州
判官及知分寧霍邱壽春三縣所至咸著政績遷秘書
丞充楚王宮大學教授律宗室以禮法神宗嘉之後以

江都縣志 卷十四
屯田員外郎通判江州遷左朝散郎親族之貧寡孤幼者皆賴其撫卹晚得目疾每命子姪執策讀於前終日傾耳危坐無倦容未卒前一日猶臥聽周書漢史口占爲詩而卒

嘉靖惟揚志

孫長卿字次公揚州人爲校書郎天禧中通判河南府秋大雨軍營壞某衆將叛長卿馳諭推最惡一人誅之衆遂定詔汰三陵奉先卒汰者羣譟長卿矯制使還而具言不可汰之故朝廷爲止知和州民訴人殺其弟長卿察所言無理曰汝殺弟也鞫之服郡人神明之爲江浙荆淮發運使歲漕米至八百萬或疑其多長卿曰吾

以備饑歲爾議者謂楚水多風波請開盱眙河自淮趣高郵長卿言役大難就事下都水調工數百萬卒以不可成罷之改陝西都轉運使踰年知慶州州無水長卿爲鑿百井泥陽有羅川馬嶺長卿訪得唐故道闢爲通塗熙寧元年知定州河北地大震城郭倉庾皆隕長卿盡力繕補神宗知其能轉兵部侍郎留再任明年卒年六十六長卿長於政事性潔廉不以一毫取諸人定州當得園利八十萬悉歸之公旣歿詔中使護其喪歸葬

宋史

王令字逢原廣陵人年十數歲晝必羣兒嬉夜獨誦書

江都縣志 卷十四
往往達旦未嘗從師爲辭章卽雄學老成人見之皆驚
年稍長倜儻不羈束周鄉里之急爲不義者面加毀折
里人滿執中以令所爲爲非是令因自悔更閉門讀書
久之所得益以閎深家貧乃聚徒天長時王安石赴召
道由淮南見令大喜期其材可與共功業因以其姨妻
之部使者以其節行聞於朝不報嘗作論語義示安石
安石荅云言微旨奧直造孔庭又爲題孟子講義及與
之書謂足下衣剝屨缺坐而語未嘗及已之窮終歲食
不葷不以銖忽妄售於人世之自立如足下者有幾令
後徙江南居於常州卒年二十八有廣陵集十卷蒙求

一卷

見王安石文集

張象中江都人有學識與子宗彝宗古聯名中第宋宣
獻公以詩贈之曰棘圍舊價喧龍首花塔新題續鴈行
當時榮之後象中直集賢院宗古集賢校理

嘉靖惟揚志

孫錫字昌齡江都人天聖二年進士授巢縣主簿改鎮
江軍節度推官知仁和縣撫下仁恕以父喪去三年舉
充國子監直講改著作佐郎遷開封府推官隨尹奏開
封當改者數事上然之道士趙清貺出入宰龐籍家受
賕下府勘實坐杖配沙門島行兩日死御史劾府希宰
相旨故杖殺清貺以滅口仁宗疑之恚罷知府推判官

以錫知太平州然清貺事獨判官王禡所決錫不自辯未幾仁宗悟非其罪復以錫提點淮南南路刑獄治淮南二年活大辟十三人考課爲天下第一召爲三司戶部判官求知宣州許之召五縣令約以州所下書有不便封還尋知舒州發常平廣惠倉以活陳許汝潁蔡流人及歸計口量遠近給食遣之去者率錢買香焚於府門比代去州人闔城門留之官至尚書度支郎中以老致仕神宗卽位遷司封賜金紫卒年七十八有文集二十卷

萬曆府志

張方平字安道其先宋人徙揚州少英秀年十三母撫

之曰揚州俗浮薄睢陽鄉里有庠序吾弟爲之領袖盍往依之割情以遣旣至就舅氏學業大進舉茂材異等又中賢良方正遷著作佐郎通判睦州當召試館職命直集賢院俄知諫院夏人寇邊方平首乞合樞密之職於中書以通謀議帝然之遂以宰相兼樞密使西師久未解方平言願因郊赦開其自新之路帝喜改慶曆赦元昊竟降旣使契丹還知制誥權知開封府府事叢集方平獨默記決遣無少差忘拜御史中丞判太常寺以侍讀學士知益州或扇言儂智高在南詔將入寇攝守亟調兵築城民大驚擾朝廷發陝西步騎往戍蜀詔趣

江都縣志 十四
方平行方平曰此必妄也道遇成卒皆遣歸他役盡罷
上元張燈城門三夕不閉得邛部始造此語者梟首境
上而流其餘黨蜀人遂安嘗畫上十四策富弼讀其奏
漏盡十刻帝稱善弼曰此國計大本非常奏也悉如其
說行之英宗時遷禮部尚書爲學士承旨帝不豫召至
福寧殿帝憑几言言不可辨方平進筆請乃書云明日
降詔立皇太子方平抗聲曰必穎王也嫡長而賢請書
其名帝力疾書之乃退草制神宗時王安石行新法方
平極論其害帝聞憮然哲宗立加太子太保薨年八十
五贈司空謚文定

叅宋史行狀

呂溱字濟叔揚州人進士第一直集賢院同修起居注
出知蘄楚舒三州進知制誥又出知杭州入爲翰林學
士疏論宰相陳執中姦邪仁宗還其疏溱曰願出以示
執中使得自辨執中去溱亦以學士知徐州賜宴資善
堂遣使諭曰此特爲卿設宜盡醉也徙成德軍時方開
六塔河宰相主其議會地震溱請罷之以荅天戒後以
龍圖閣直學士知開封府辨訟立斷豪惡斂跡已而病
卒年五十五贈禮部侍郎帝悼念之詔官優給賻禮官
庀其葬溱開敏善議論一時名輩皆推許然自貴重
在
杭州接賓客不過數語時目爲七字
人云

宋史

江都縣志 卷十四
張康國字賓老揚州人登元豐進士第知雍邱縣紹聖
中提舉兩浙常平徙福建轉運判官崇寧元年入爲吏
部左司員外郎二年爲中書舍人徽宗知其工詞章不
試而命遷翰林學士知制誥三年進承旨拜尚書左丞
以其兄康伯代爲學士尋知樞密院事是時西北邊帥
多取部內官自辟置康國曰塞吏當擇人奈何欲私所
厚善乎乃隨闕選用著爲令上嘗欲擢用張邦昌康國
對曰邦昌貌悞而心狠不可任金人數侵中國邦昌請
修子姪禮康國力拒之卒贈開府儀同三司謚文簡

萬

曆縣志

孫洙字巨源錫之子羈州能文未冠擢進士包拯歐陽
修吳奎舉應制科進策五十篇指陳政體明白剴切韓
琦讀之太息曰今之賈誼也再遷集賢校理知太常禮
院治平中求言洙疏時弊要務十七事後多施行兼史
館檢討同知諫院乞增諫員以廣言路王安石主新法
多逐諫官御史洙乃力求補外得知海州免役法行常
平使者欲加斂緡錢以取贏爲功洙力爭之方春旱發
運使調民濬漕渠以通鹽河洙持之不下三上奏乞止
其役旱蝗禱胸山徹奠大雨蝗赴海死尋幹當三班院
三班員功罪籍不明吏爲姦欺洙甚其甚者八事定爲

令同修起居注進知制誥洙言遷竊不宜用一定之詞
詔自今封贈蔭補每大禮一易他皆隨等撰定元豐初
兼直學士院澶州河平詔作靈津廟碑神宗獎其文擢
翰林學士纔踰月得疾時叅知政事闕帝將用之數遣
中使尙醫勞問竟卒年四十九帝臨朝嗟惜常賻外賜
錢五十萬洙博聞強識明練典故雖對親狎者未嘗發
一鄙語文詞典麗有西漢之風士大夫共以丞輔期之
不幸早世一時憫傷焉

宋史

楊處厚字純甫江都人以父闕恩補齋郎加校書郎不
受召爲婺州浦江尉均平徭役邑人悅服爲永康錄事

叅軍地控威茂同官皆武人處厚善於協恭兵民之政
無不關預守者賴以治卒於官

萬曆府志

王幾字彥成江都人知舒城未赴丁父憂王安石知其
才選宰長洲縣縣號難治幾弛張以時豪強懾服歲饑
廣爲賑救民無轉徙權勢者欲侵撓之執法不回治聲
聞京師仕至大理寺丞

萬曆府志

孫馨字叔靜錢塘人父直言徙揚之江都馨年十五遊
太學蘇洵滕甫稱之調越州司法叅軍守趙抃薦其材
知偃師縣韓縝鎮長安辟入府召對擢提舉廣東常平
徽宗初徙兩浙由福建轉運判官乃爲屯田員外初馨

江者縣志 七十四
與蔡京善常言京才勝德恐貽天下 至是京還朝遇
諸塗逆謂曰我若用於天子願助我磬曰公誠能謹守
祖宗之法以正論輔人主示節儉以先百吏而絕口不
言兵天下幸甚磬何爲者京默然既出提點江東刑獄
未幾入爲少府少監戶部郎中時縣官用度無藝磬與
尙書共疏論之當國者不樂徙磬開封遷太僕卿殿中
少監四輔建以顯謨閣待制知曹州論經始規畫之勞
轉太中大夫徙鄆州尋罷提舉鴻慶宮起知單州遂致
仕靖康二年卒年八十六贈銀青光祿大夫謚曰通靖
磬篤於行義在廣東時蘇軾謫居惠州極意與周旋二

子娶晁補之黃庭堅文黨事起家人危懼磬一無所顧
時人稱之 宋史

莊徽字彥猷江都人政和初除兩浙運副二年召還歷
徽猷閣待制知平江府時朱勔被寵中貴緣勔而使者
冠蓋相望官吏無不傾身事之徽獨不假借朝廷命官
造乘輿服御於浙西特令徽與勔協理尋詔罷勔尙遷
延觀望徽曰此天子盛德事大臣亟當承奉何顧其他
卽日罷之在官六年乞閒不允久之提舉洞霄宮卒 萬

曆府志

李正民揚州人登政和二年進士第 詞學兼茂科累

遷禮部郎官建炎二年除校書郎累遷中書舍人俄出
 為兩浙江西湖南撫諭使正民請依法具奏官吏能否
 其民間事干州縣實負冤抑者並聽陳訴即為伸理從
 之以奉使稱職除給事中吏部侍郎正民辭不拜上特
 賜詔使就職紹興十三年正民奏宣和以前通令佐並
 帶主管學事軍興以來學校之教中輟今宜依舊給銜
 以示聖朝偃武修文之意為江西路提點刑獄仕至左
 朝散大夫充徽猷閣待制平原縣開國伯卒

嘉靖惟揚志

王昂揚州人少以文學知名政和八年廷策進士嘉王
 楷第一上不欲以王子魁多士擢昂置榜首除秘書省

校書郎宣和元年昂言今後除卿監未經上殿者乞令
 如郎官之法並令閣門引見從之高宗即位除尚書工
 部員外郎遷起居舍人秘書少監時御府頒降書籍四
 百九十二種曾攷家藏書二千六百餘卷昂請分為經
 史子集四庫委官校讐其脫落譌舛者以別本參考補
 寫畢則繳進除徽猷閣待制知台州尋奉祠江州卒於
 家

嘉靖惟揚志

王居正字剛中揚州人熙寧中王安石以新經義頒天
 下居正獨非之十餘年不應舉宣和三年始第進士以
 范宗尹薦命對便殿上甚說高宗初九正次前世聽納

事爲集諫十五卷并請省費等務。言以上一日於上前論秦檜曰：檜前自言他日爲相當聳動天下，今所措注止是願以臣言詰檜。檜聞而銜之，出居正知婺州，州歲貢羅萬疋，漸增至五萬疋。居正疏：五不可上，如居正請減其半，州貢炭膚理非胡桃紋鶉鴿色者，不中程。居正疏止之，召爲中書舍人兼史館修撰，救弊補闕，所還制勅甚衆。其後檜益專國，居正知不爲所容，請祠言不及時事，檜終忌之。諷中丞何鑄劾居正爲趙鼎汲引奪職，凡十年檜死，復故職。居正根柢六經，以崇是闢非爲已任。黜王氏之說，嘗與楊時會毘陵，時出所著三經

義辨示居正曰：吾舉其端，子成吾志。於是愈感勵，積十餘年爲毛詩辨學十三卷、詩辨學二十卷、周禮辨學五卷、辨學外集一卷、又竹西集十卷、西垣集五卷。萬曆府志

李易字順之，揚州人，好學多聞，以清素見稱。建炎初，高宗駐蹕維揚，策試進士，易爲第一。以上憂勞辭，聞喜宴從之，授僉書江陰軍判官。會金人至夏港，距城數里，守臣胡紉謂易曰：吾曹當死城郭，君有母，宜急避之。易歸告其母，蔣氏母曰：我去則汝必無意，堅守死生當與汝同之。由是易守益固。金人亦引去。紹興元年爲太常博士，韓世忠辟易參謀，轉工部員外郎，爲太常寺少卿，自

建炎維揚之變宗正寺所掌圖牒比逸于江許至是易請編次玉牒從之遷中書舍人改直秘閣知揚州易以本貫辭不許官至敷文閣待制隨奉祠卒於秀州萬曆府志李衡字彥平江都人高祖昭素仕至侍御史衡紹興中登進士第授吳江主簿有部使者怙勢作威投劾歸起知溧陽縣榜夏秋二稅期日于縣門鄉無吏迹而輸送先他邑辦四年未嘗繫一重囚隆興二年金兵至淮堧官沿江者多送其孥衡獨自浙右移家入縣民心大安盜蝟起旁境而溧陽獨靖晏轉運使等列上治狀召入為監察御史歷司封郎中樞密院檢詳出知溫婺台三

州惟婺嘗涖其治加直秘閣而衡引年乞身上累郤其奏除秘閣修撰致仕上思其樸忠旋召落致仕除侍御史以老固辭不獲命差同知貢舉會外戚張說以節度使掌兵柄衡力疏其事謂不當以母后肺腑為人擇官廷爭移時改除起居郎請老愈力上知不可奪仍以秘撰致仕衡後定居崑山結茅別墅聚書萬卷號曰樂庵卒年七十九衡自宣和間入辟雍同舍有趙孝孫者洛人也其父實師程頤勸衡讀論語曰學非記誦詞章之謂所以學聖賢也不可有絲毫偽飾處方可以言學衡心佩其訓雖博通羣書而以論語為根本臨沒沐浴冠

櫛翛然而逝周必大聞之曰世謂釋氏乃能達死
生衡非逃儒入釋者而臨終超然如此殆幾孔門所謂
聞道者歟 宋史

史正志字志道江都人紹興二十一年進士授歙縣尉
秩滿詣闕上保治要畧八篇丞相陳康伯薦於朝除樞
密院編修乞築和州城及舒揚防守荆襄事宜高宗視
師江上命扈從至鎮江又上恢復要覽五篇且指張浚
之失至建康又言三國六朝形勢與今日不同要當無
事則都錢塘有事則幸建康以爲東西都詔下侍從臺
諫集議從之尋除司農寺丞孝宗卽位除度支員外郎

後因論左帑南庫西庫窠名差互忤時相以散官謫永
州尋復原官除右文殿修撰知靜江府未赴而罷賜爵
文安縣開國男轉朝議大夫後歸老姑蘇號吳門老圃
所著有建康志十卷菊譜一卷 萬曆府志

牛大年字隆叟江都邵伯人慶元二年進士歷官將作
監主簿入對言人主當以天命人心之所繫致念又言
今日士氣久靡宜振起之夫有扶持作興之意而後搢
紳無貪名嗜利之習無貪名嗜利之習而後有持正秉
義之操言多剴切遷軍器監主簿歷進直寶章閣爲工
部郎官入對請懲貪吏累升秘書監起居郎兼崇政殿

說書以寶章閣待制提舉太平興國宮卒特贈四官大年清操凜然所至以廉潔自將

宋史

姓譜云大年知黎州治鎧甲增料錢以優郡兵會大水卽以私帑賑民比還朝一夫荷擔而已郡人

歌之

李直養字無害正民之孫也紹熙元年以薦攝華亭令是年夏久旱直養精禱遂獲大雨三日畝澮沾足秋旱再禱又應歲用大稔二年丞平湖以當路薦遂命爲令邑境沿海多有溺屍乘潮以上暴露沙際直養置塚塋瘞之未踰年凡瘞百五十餘人又知海鹽縣修建學校

作小學定爲章程擇教諭朱沆爲之師由是里巷絃誦

洋洋盈耳風俗丕變民爲立去思碑

嘉靖惟揚志

田克悉字安叔江都人學問該博爲鄉里所推嘉定元年登進士任松溪主簿秩滿試博學宏詞科崔與之帥揚甚敬禮之及鎮蜀辟置幕府資其贊畫後知沔州在任決疑獄抑僥倖節浮費政績茂著民甚愛之

萬曆府志

元彭好古字德明江都人泰定二年尹崇安縣每朔望

及上下旬暇日輒率邑儒與吏詣學講解經史立惠民

局新廣福橋多所建立

嘉靖惟揚志

曲出江都人爲邵武達魯花赤儉其寬仁清心寡欲爲

政不擾僚屬化之汀寇犯境賴出_江尋郡以無事

嘉靖

惟揚志

明邱民字克莊江都人洪武初爲松江府學訓導慕學之士自遠而來十餘年無慮千數松江一時文風之盛不下鄒魯

列朝詩小傳

志云民洪武九年舉於浙江宋濂鄭戩以知禮薦歷官禮部侍郎卒葬蜀岡禪智寺前

陳琰字公信江都人洪武間貢入太學授監察御史巡按雲南每出解見東家烟突出人手作招訴狀心知其有寃猝召其家督錮之而搜檢其家物得江西估客路

引一紙乃出訊之曰爾前者沒估客財而殺之匿其屍竈下今露矣其人卽伏罪時詫其神歷陝西左布政使多惠政以忤藩邸歸

萬曆府志

張冕字汝端江都人由舉人同知台州府官俸外一蔬不擾於民衙署清肅直謁無敢入考滿增四品俸復任五年比歸家人誤持官釜入舟至中途始覺急還之遷澂江知府操履益峻後家居運使畢亨知其貧以金遺之固辭不受

嘉靖惟揚志

馬岱字伯瞻江都人成化丙戌進士初任戶曹會計出入人莫敢欺後知泉州府泉民有數世不葬其親者岱

至諭以禮旬月葬以千計僧以尼爲下院岱罪其尤者
餘尼以配平民識者服其重風化內艱解任行李蕭然
性剛峭好面折人過不避權貴人憚而怨之然守正嫉
邪論者謂亦今之矜也

嘉靖惟揚志

高銓江都人成化己丑進士爲河南按察使風紀整肅
陞左布政使治行異等以左副都御史巡撫保定有奸
民獻民田爲皇莊者侍郎許進奉命會勘寃聲撼野至
毆州縣吏不得行進遽欲以小民寃狀聞銓曰此固爲
民至意萬一不測如重民罪何請第勘實聞上雅愛民
必不忍奪其生奏上果然正德中爲南戶部尙書忤劉

瑾致仕逮獄瑾誅復官銓精通律令自謂治律之功不
減治經史推挽名下後進不遺餘力

名山藏

志云銓字宗選始入仕或勸增年以就科道亟謝
不可爲按察時歸德有黃河退地千餘頃爲親藩
所據上命中官與銓按實銓欲還民中官怒脅以
惡語執不變竟如銓議張秋河決上治河十二議
銓性溫厚好禮家居雖鄉黨小吏來謁亦必公服
迎送鄉人感之卒賜祭葬

金秀江都人成化丁酉舉人正德初知保康縣廉介正
直吏民不敢欺時歲稔兵擾民將寃云乃推誠撫安之

民始樂業尤加意學校待士以禮六風漸興去官後民祠祀之

姓譜

盧瀚字文淵江都人弘治癸丑進士授兗州府推官政操敏肅洗冤澤物他郡獄多待決累斷大獄有異政郡人祠祀焉行取爲南道御史首論周經許進當從衆薦速乞召用文森等因論事下獄宜爲寬宥其邪佞如陳瑤李溫俱可斥免雜進如孫伯謙等亦乞罷遣又因災異力請開納讜言以祛敝政及清冗食用省京儲凡所論列並切大體遷知岳州府以疾乞歸吏部覆勘瀚公勤清愷悌慈祥題准令其回籍養病俟痊日起用尋

卒

嘉靖惟揚志

趙鶴字叔鳴江都人弘治丙辰進士授戶部主事爲尙書侶鍾所知壬戌天下大祲鶴代草上寬恤事宜詔文武大臣會議蠲諸不急著爲例陞本部郎中督永平山海薊州糧草兼視屯田條上邊場急務十六事又以徵收豆草積久腐敗奏請折價貯庫臨時和糴以給軍需其古北口等倉儲不足以供遊兵請更番操練有警調發自是邊儲賴焉正德初陞建昌知府益府軍校有恣橫虐民者捕置之法所治肅然闡瑾以規賂不得搜薊州耗糧事左遷南安同知尋擢金華知府在郡疏請廣

江者縣志 卷一四
折徵寬加派備積貯禁溺女諸事。東萊北山魯齋仁
山白雲五先生遺書爲正學編集范香溪以下諸家爲
金華文統集劉孝標駱賓王舒元興及近世四十餘人
爲文統拾遺表范文簡潘默存之里皆正俗誠民之要
擢山東提學副使或以其約士過嚴爲蜚語謗之卽上
疏乞致仕歸築精舍江滸日夕嘯詠其中嘗編維揚郡
乘著具區文集若干卷 康熙府志

徐昂字文舉江都人弘治丙辰進士授兵科給事中屢
疏陳治道及論邊備皆切中時務正德初劉瑾引用其
黨馬永成谷大用等八人戶部尙書韓文抗疏暴瑾罪

惡瑾矯旨罷文昂疏言文歷官年久端謹素著國家倚
以爲重不宜罷瑾矯旨并奪昂官嘉靖初卹錄舊臣起
昂爲廣東右參議昂初無子就王生相生曰君今年登
第但不宜子後在西安途中買一妾詢之乃良家子卽
焚券爲擇配秩滿如京師相者迎謂曰君相頓異可得
子矣後數歲果育五子 康熙府志

左唐字堯卿江都人弘治丙辰進士爲廣東叅政署司
篆吏無所容奸恨欲撓之會查盤使者至所盤計鉅萬
獨羨餘百金訝其少詰守藏者皆曰事由署印叅政使
者弗審徑以論唐唐忿而病僚友慰之拊膺曰平生砥

江者縣志 卷十四
礪名節顧乃蒙垢若此遂不食而死同寅並藩臬會呈
撫按言唐寬巡按爲覆盤庫則應有羨餘故在實不止
百金將奏雪之以唐喪歸乃止唐性廉介以官爲家不
問生產比喪歸囊橐蕭然倫以訓爲誌墓直書其寬
嘉靖惟揚志

葉相字良臣江都人弘治壬戌進士初司理金華平獄
均賦郡民戴之入爲給事中時劉瑾擅政中外無敢言
相首疏劾瑾又上建儲及漕運庫藏等十餘疏皆剴切
識治體因忤仇鸞出叅政貴州歷江西布政使已復擢
貴州巡撫會芒部構亂相討平之賜鏹幣擢戶部侍郎

尋以病予告久之起補刑部侍郎終三年不調或諷以
賂主爵者相笑曰有納粟尙書耶予告歸築迂隱園
以老卒賜葬祭贈右副都御史祠鄉賢子曉以廕授南
京中府都事

康熙府志

盛儀字德璋江都人弘治乙丑進士觀吏部政時劉瑾
以事干尙書托儀致書儀拒不許以是知名授禮部主
事改監察御史時文體日靡儀請崇濂洛之學以挽士
習陞山東按察副使勦商河巨盜寬夫役之困東人戴
之遷雲南叅政察屯務清宿蠹尋陞湖廣按察使督修
顯陵多所節省又活饑民萬計入戶太僕寺卿立解馬

法遂著爲令儀歷官以清峻著名致仕歸橐無餘貲
薄田敝廬僅足自給尤篤於孝友兄弟終身同居卒祀
鄉賢所著有維揚志二十卷儀初學於章懋鄉人咸推
其學術醇正無悖於程朱云

康熙府志

高滂字穎之銓子也弘治乙丑進士正德初劉瑾羅織
大臣誣逮銓下詔獄滂伏闕請以身代疏詞迫切事得
雪宸濠謀逆陰賂璫請添設護衛滂抗疏陳祖宗法無
增設藩王護衛例不可許且發其不軌事事遂寢後宸
濠反人服其先識焉時大臣出治張秋決河又討江西
流賊久無功滂并疏治河討賊之畧仕至南京光祿寺

少卿 康熙府志

王儼字士望江都人弘治乙丑進士知光澤縣以廉謹
稱擢南京刑部主事人不可干以私有權要子殺人論
之如法陞郎中執操愈嚴出守岳州以直道不容歸鄉
人重之

康熙府志

王軌江都人弘治十二年進士正德初歷工部員外郎
屢遷山東左布政使嘉靖初入爲順天府尹房山地震
軌言召災有由語多指斥忤旨切責尋遷右副都御史
巡撫四川芒部土知府隴慰死庶子政與嫡子壽爭立
朝議立壽政怒使人誘殺壽奪其子軌乃會貴州兵擒

江都縣志 卷一四
政於水西璽書獎勞爲戶部右侍郎覈九門首宿地以
餘地歸之民勘御馬監草場釐地二萬餘頃募民以佃
房山民以牧馬地獻中官韋恒軌釐歸之官奸人馮賢
等復獻中官李秀秀爲請於帝軌抗疏劾之竟治賢等
如律覈勛戚莊田請如周制計品秩別親疎以定多寡
非詔賜而隱占者俱追斷戶部尚書梁材採其言兼并
者悉歸官稍進左侍郎罷歸以兵部尚書李承勛薦起
故官總督倉場再遷南京戶部尚書改兵部詔舉將材
薦鄭卿沈希儀等二十一人皆擢用居四年以老乞罷
久之卒 本傳

志云軌字戴卿初授戶部主事監崇文門稅司禮
太監蕭敬家奴市猪隱稅軌執而訊之忽健卒數
十擁奪去敬以告尚書侶鍾鍾笑曰乳犢寧知畏
虎耶陞員外郎奉命視直隸閩浙倉庫時劉瑾怙
權每使還必以賂見軌獨不往瑾怒令科道覆覈
卒無所加罪改工部員外郎監遵化鐵冶瑾黨致
書爲薪炭戶請託且恐以危言軌不顧將具疏劾
之會瑾敗乃已爲順天府尹時內官有迎進大祀
神牲需求無所得令所經道路築堤費不貲軌奏
其生事害民狀權璫憚焉起督倉場時請罷京

通二倉太監及重開會通河今太倉草場災軌上
 疏自劾且勸上修德以回天意在南京年七十
 上疏乞致仕家居五年卒諭祭二壇仍命工部治
 葬軌性至孝為諸生時父病思食柿不得遂終身
 不食

陳達字兼善揚州衛人授威遠令銓部舉天下廉吏七
 人達居其一後以病歸民立去思碑頌之

康熙府志

陳言字汝行江都人正德丁卯領鄉薦授棗強令治稱
 廉明有權璫欲造橋衡水令棗強助費巨萬言執不可
 罷其役邑旱徒跣以禱俄雷雨大作邑以大稔考滿遷

處州通判棗強士民遮道泣留建祠以祀

康熙府志

俞敦字崇禮江都人正德辛未進士改庶吉士授刑科
 給事中敦在諫垣首劾遼蜀撫臣及諸藩守臣不職者
 時江彬潛圖不軌朝臣無敢言敦獨疏陳其逆狀不報
 戊寅命勘河南總兵張璽等不法事敦執法按罪踰月
 獄成眾咸服焉一時權倖如錢寧輩憚敦名求與納交
 皆峻拒之遷禮科右給事中世宗即位敦首疏四事一
 曰去壅蔽二曰親儒臣三曰立紀綱四曰惜名器後奉
 詔使安南賜麒麟服進都給事中出知廣西梧州府
 卒

康熙府志

徐晉字文明江都人正德辛未進士歷任南京兵部車駕郎中大璫劉瑯怙勢晉繩之以法宸濠叛南都震恐大司馬喬宇謂晉曰吾視僚屬惟君才可任宜努力悉以軍事委之晉選將調士修備器械增置船艘晝夜不怠及上駐蹕南都供億旁午晉從容取辦有言宜賂江彬者不聽人爲晉危而卒無患陞青州知府以勞致疾易箒時同官憫其貧請納公銀若干晉峻拒不受且曰吾恨不能如前輩馬伯瞻清風高節敢至死變其守乎

康熙府志

樓觀字國光江都人正德丁丑進士授刑部主事陞員

外郎中出守興化政尙寬惠吏無敢爲奸仙遊苦海寇爲擾觀鑿石築城民賴以安每行縣自庀厨傳不擾下邑陞湖廣副使致仕橐中惟載圖書數卷而已觀之先出嗣葉氏至子懋中嘉靖壬戌成進士官刑部主事始疏復樓姓

康熙府志

高遷字升之銓從子正德辛巳進士授寧波府推官攝郡事會日本貢使構亂遷討平之陞戶部主事員外郎督糧通州值邊警歲漕四百萬石無缺陞郎中尋知順德府時車駕幸承天道出順德遷抵任甫及旬區畫帳無不立辦城沙河工竣陞河南按察司副使會河決

江都縣志 卷一
睢州野鷄岡奉勅治之漕爲鑿系纜口塞河二百二十
五里以疏橫流復扈運口九十里上遣兵部侍郎王
旂視其役薦漕勞績第一明年益發民濬三河未深者
漕運賴之詔增俸一級百姓肖像祀焉所著有南兗州
集順德府志 康熙府志

李樹敏江都人以選貢授嘉善丞修築海隄著有勞績
再補安福丞時值均田敏自治食具出入阡陌不以煩
民除夕有餽豚蹄者家人受之業就鼎矣令挈以還之
其清介類此卒於官士民皆垂涕祀之名宦 康熙府志

李應暘字子新江都人以歲薦授臨邑訓導遷龍游再

轉懷慶教授時興國吳國倫爲叅藩特器重之陞南雄
推官分權梅嶺橋滄泲兩稅歲課巨萬不私一錢兩臺
及郡守共歎美焉三載以疾乞致仕年七十八卒 康熙府志

何城字叔防隨父自榆林移家江都嘉靖壬午中陝西
鄉試壬辰成進士改庶吉士授刑部主事時外戚張鶴
齡等爲世廟所惡下吏坐重罪城憫之寬其獄禁以是
謫安州同知安居衛河下流歲苦澇田禾不登城白當
道築堤防之是後數有年因號曰何公堤移徽州同知
擢工部郎中方士陶仲文被幸其徒多不法城劾之
遠戍出知武昌府楚世子英耀與所幸甘玉海謀逆城

飛書白巡按御史先禽玉海杖殺之散其護衛世子竟抵法并戮其黨陞山西按察副使分巡冀南道投劾江都會倭寇作亂城創議築外城時多迂之未幾倭犯揚州城外蕩然煨燼於是始議興築甫畢倭再至不得入引去民以安堵皆城力也城與弟堅少從鄉人呂楠學共砥礪至白首焉

康熙府志

方岑字高伯江都人嘉靖丙戌進士授大理寺評事陞南京左寺正踰年出知杭州府先是海寧令某於巡按御史爲肺腑親引用巨猾六七人恣營奸利度叢民怨乃逮六七人者下獄夜使人殺之以滅口事發憲臣下

岑按驗得實庭笞逐之岑亦竟爲御史陰中罷免岑爲文宏博出入左氏韓非劉向諸家詩宗初唐而風骨不衰然好用古文奇字人多不辨亦其癖也平生撰著極博草多散逸止存竹素齋集幾十卷

萬曆府志

蔣應奎字文煥先世故江都人以永樂初戌大同遂家大同嘉靖乙酉舉山西鄉試丙戌成進士授工部主事分司呂梁陞郎中改營繕司董九廟慈慶慈寧諸大工告成賜銀幣陞太僕少卿久之陞應天府尹時鎮田萬畝荒弗治稅悉徵之里人應奎親往勘爲出金築堤民開懇成腴田以免里人困累至之便之陞都察院右

副都御史巡撫遼東請發內帑築息墻二百餘里僅四月竣工省費萬計陞兵部右侍郎協理京營戎政致歸江都行李蕭然性嗜學手不釋卷語天下事歷歷如指掌清修鯁介其天性也乙丑卒葬於江都縣之馬鞍山萬曆府志

曾銑字子重江都人嘉靖己丑進士初知長樂縣擢御史巡按遼東遼陽兵辱撫臣呂經爲亂銑急檄副總兵罷經苛急事爲亂軍乞赦而刺得爲惡者數十人姓名同日捕獲上言爲亂首惡宜急誅乃悉坐斬懸首諸城全遼大定擢銑大理寺丞遷右僉都御史巡撫山東俺

答數入內地銑請築臨清外城工畢進副都御史居三年改撫山西經歲寇不犯邊進兵部侍郎二十五年夏總督陝西三邊軍務寇十萬餘騎由寧塞營入大掠延安慶陽銑率兵數千駐塞門而遣前叅將李珍搗寇巢於馬梁山陰斬首百餘級寇聞之遁時套寇牧近塞居民不敢樵採銑方築塞慮爲所擾乃選銳卒擊之寇稍北間以輕騎入掠銑復率諸軍驅之遠徙詔增銑俸賜銀幣有加銑念寇居河套久爲中國患上疏請以銳卒六萬鎗手二千每歲春夏交攜五十日餉水陸交進搗其巢爲一勞永逸之策條八議以進是時銑欲西自

定邊營東至黃甫川一千五百里。邊牆請帑金數十萬。期三年畢功。疏並下兵部。部臣難之。詔曰：鈇倡恢議甚壯，其令鈇與諸鎮臣悉心。上方畧予修邊費二十萬。鈇乃益銳合諸臣條上方畧十八事。已又獻營陣八圖，並優旨下廷議。廷臣見上意向鈇，一如鈇言。輔臣夏言欲倚以成大功，主之甚力。嚴嵩與言有隙，欲借事傾言，乃極言套必不可復，陰詆言以激帝怒。旋復顯攻言，謂向擬旨褒鈇，臣皆不預聞。兵部尚書王以旂會廷臣覆奏，遂盡反前說。言套不可復，帝乃遣官逮鈇，然無意殺之也。會咸寧侯仇鸞鎮甘肅，以驕恣爲鈇所劾，逮嵩

故雅親鸞，乃代鸞獄中草疏，誣鈇掩敗不奏，尅軍餉鉅萬。遣子淳屬所親賂當途，其言絕無左驗。乃竟擬斬。卽日行刑。鈇旣歿，家無餘貲。隆慶初，給事中辛自修御史王好問訟鈇冤，詔贈兵部尚書，謚襄愍，賜祭塋。廕子汴判應天孫之省判湖州府。

本傳

徐子麟字瑞卿，其先自甘州徙江都。子麟以太學高等補貴州都司，經歷未幾移雲南都司，經歷委理五井鹽課，爲前官補負課千餘緡。前官卒，又倒橐助其喪還陞。澂江通判晉烏撒同知，會苗兵亂，諭以大義，諸苗帖無何被讒論，罷。子麟欣然曰：麟爲黑邊傲二十年，今得

生還幸矣歸築一草閣與諸舊好以琴書爲娛後竟以貧死

萬曆縣志

桑喬字子木江都人嘉靖壬辰進士授戶部主事督草場稅宿弊頓清尙書梁材稱其練達老成吏部侍郎霍韜亦器重之改監察御史按山西時大同初定渾源失守邊民被傷者甚衆喬躬行塞上掩骼埋胔劾將臣魯剛季懋輩失機正法州邑被兵殘破者疏免其征賦又諫止車駕毋巡邊及籌邊方畧十餘條代還適奉天殿災陳時政并劾禮部尙書嚴嵩兵部尙書張讚戶部尙書張雲工部尙書林廷楫詔罷雲廷楫而留嵩讚時帝

方眷注嵩而喬疏論之且連四大臣直聲震天下嵩大銜恨已亥上幸承天疏請留不允扈行在改巡按順天會邁寒疾疏乞骸骨歸嵩授指都御史王廷相令劾喬規避廷相素重喬不卽上嵩曰上怒且相及矣會經歷李錞譖喬短廷相遂奏論喬逮赴詔獄廷杖幾死謫戍九江二十六年不歸念母老治廬迎養母後歸江都喬獨居一室惟一僕供掃除汲爨而已嗜易占得其微奧所著有廬山記二十卷真詮四卷詩文二十卷卒於人所隆慶初奉遺詔贈光祿寺少卿

康熙府志

張曦字景芳江都人爲攸縣令良素梗曦以躬行化導

之絕餽納寬徭稅數年乞歸民爲立生祠以彰其愛家
居益崇清儉一時靡俗知警愧云

嘉靖惟揚志

曹守貞字子一江都人嘉靖戊戌進士知遂昌縣邑占
採礦役守貞條上其害遂得罷庚子入覲同官傾之左
遷晉州判官攝趙州移知曲周縣皆有惠政陞工部營
繕司主事權荊州關稅時遼庶人恣暴于荆守貞不爲
撓遷員外郎陞尙寶司丞典司者爲嚴世蕃與議多不
合謫山東轉運判官移饒州府同知久之擢南京戶部
郎中有頃京營訛言部議欲裁粟布軍士大闕尙書患
之問守貞守貞移牒諸將士擇時日覈軍實稽詐冒給

糧布諸軍士相顧愕曰何傳之謬耶事遂寢出爲平樂
知府錄囚多從未減尋乞休歸閉戶讀書不預外事所
著有畸侔軒藁

康熙府志

崔繩字淳甫江都人嘉靖癸卯舉於鄉授清苑教諭陞
靈壽知縣邑小而民狡悍令多不滿任或調或罷去繩
凡再考最民甚德之擢倅萊州乞歸故廬庠陋茹蔬飯
糲翛然竟日卒年八十七尙書劉先濟志其墓

康熙府志

楊守誠字惟一江都人嘉靖丙午舉於鄉授南樂知縣
遷河間府判再遷益府審理所至有能聲致仕歸里
副使何城力請於太守吳桂芳築揚州新城併瓜洲城

以禦倭寇所著有防秋紀行稿屯鹽總議諸書

康熙府志

李承式字敬甫其先世自大同遷江都嘉靖丙辰成

士初任錢塘知縣以執法忤齟使者調深澤除奸屯

神明擢兵部主事上封事八條皆報可尋備兵榆林法

令嚴整壁壘一新陞陝西布政使以疾辭歸會倭犯朝

鮮以承式有邊才召用多立軍功陞福建左布政使尋

致仕惟汙萊數頃以供餽粥築一室湖上扁舟往來足

不履城市卒祀鄉賢子植別有傳杜禮部郎中柄監察

御史雲南巡按俱有政聲

康熙府志

馬豸字伯直其先自大同遷江都中嘉靖壬子舉人授

薊州知州州迫輦下賦役繁重豸拊循百姓多善政遷

鎮江同知署丹陽篆丹陽故有馬嘶港溉田數百頃久

淤填民廬其上旱澇為沴百姓數請為築黠者所梗豸

力疏之三月工成民大稱便累遷河南按察使僉事嘗

相視徐邳河知其勢必南徙條上防濬事宜未竟而卒

時共惜焉

萬曆縣志

李植字汝培承式子萬曆丁丑進士改庶吉士授監察

御史十年冬張居正卒馮保猶用事其黨錦衣指揮

知徐爵居禁中為閱章奏擬詔旨如故居正黨率倚

以自結於保御史江東之首梟爵奸植遂發保十二大

罪帝震怒罪保明年植巡按畿輔請寬居正所定百官乘驛之禁從之既而帝手詔吏部擢植太僕寺少卿

臣益忌植適帝欲卜壽宮於大峪山植謂其地未善

史柯挺自言習葬法力稱大峪之美給事中王敬民等

又迭疏攻植遂貶植綏德知州引疾歸居十年起沅州

知州累官右僉都御史巡撫遼東植墾土積粟得田四

萬畝歲獲糧萬石戶部推其法於九邊又奏稅監高淮

貪暴請召還不報後乞休家居卒贈兵部右侍郎

本傳

志云植抗疏馮保罪乘間投匭退朝同列稍傳其事至噤汗反走夜半忽傳旨逐保籍其家上由是

欲併籍居正家居正雖剛復自恣實未黷貨卽攻之者咸知其冤莫敢爲辨植獨言故相居正爵可削家不當籍人服其公上亦以盡忠言事褒之

張肖孫江都人祖鎧嘉靖間江淮饑輸粟千石助賑詔

旌以官肖孫萬曆丙子舉於鄉初令上猶再宰南平俱

疲邑難治而化其刁悍以循良稱官至長沙郡守

康熙府志

章潤字實甫江都人萬曆丁丑進士授浙江安吉知州

州故确瘠民悍難治潤廉敏通達因俗而導民以帖服

陞刑部員外郎著律例贅言若干卷陞江西瑞州知

會歲饑盜起潤禽捕其渠餘悉逃竄境內以安陞四川

按察副使備兵松潘甫至幕下騎士謀作亂潤廉得其
主名陰授方略擒斬之陞廣東右叅政卒於官

康熙志

閻士選字立吾江都人年十二能文章學臣耿定向以
置第一命隨試十四郡皆冠軍成萬曆庚辰進士仕蘄
水令以不附張居正阨抑十年始擢刑部主事多所平
反陞登萊道備兵鴈門巨寇柳廷瓚倡亂選以計平之
晉山西右布政使以勞瘁卒官子汝梅

康熙縣志

馬一駿字強吾江都人以選貢授安縣令初至以前宰
闕茸吏侵庫帑逾萬株連追取邑無完家一駿惻然憫
之會臺司察其能委運松潘例有羨費駿曰是可藉手

矣盟諸神以美金補庫三年而侵帑報完株連悉免以

卓異薦陞河曲知州安人祀之名宦

康熙府志

蕭灼如字茹一江都人由選貢授廣東潮州通判職司
糧民多逋賦灼如盡爲請免歲饑捐賑存活甚衆巡按
周應期知其才所至以灼如從凡有疑難詢之立剖潮
關有稅亦命其代理灼如設匭中庭令自投其中不問
羨餘巡按益重之將疏薦會灼如以積勞得疾告休卒

祀鄉賢

康熙府志

鄭茂華字實符江都人萬曆甲辰進士由部郎出爲
江按察副使時溫處多寇茂華至皆望風遁進廣西布

江者縣志 卷十四
政使廉潔不侵一縉時靖藩爭立三司思變華諭以大
義立解天啓間魏璫煽虐所在立生祠惟廣西不應
強項如此崇徵初舉卓異召對平臺稱旨陞副都御
巡撫廣西有土司陰謀起釁華指授方略殲其渠魁諸
桀驁者咸遵約束考績晉通議大夫御書天下清官於
屏尋命攝兩廣總督以病乞休溫詔慰留者再歸里杜
門未嘗營田宅卒贈正議大夫兵部侍郎廣西祀名宦
康熙府志

史啓元字蓋卿江都人萬曆甲辰進士授南戶部督淮
閘稅尋移南吏部天啓初擢湖廣按察副使備兵衡永

會岷藩有變中使往勘羣宗譁甚啓元至數語折服遂
定岷封粵寇闖入楚境啓元於廣贛孔道設木蘭臘嶺
二關募兵守之賊不得奔逸殲其渠魁脅從解散境內
獲安被病乞休歸臥林下嗜書臨池不輟年八十卒祀

郡鄉賢

康熙府志

馬呈秀字君實其先大同人隨父業鹽筴籍江都呈秀
早孤嗜學登萬曆甲辰進士未拜官卽疏請終養服除
官大理寺評事凡奏疏諸牘援引經傳同列悚服出知
延安徇賊入境親督兵捕擊擒其渠魁治延五年收
流民萬戶墾荒田數萬畝入其租爲民允逋賦尚書趙

江者縣志 卷一四
彦稱之陞福建按察司副使擒礦盜有以祀福建名宦
康熙府志

朱家民字天民江都人以祖戍滇南遂家曲靖萬曆丙午舉雲南鄉試初知涪州舉卓異轉潮州再移真定舉邊才擢貴陽守值安酋叛攻圍省會餉道俱絕家民羅雀捕鼠以死自誓乞援募兵卒解黔圍丁外艱奪情陞副使轉按察使讞獄多從末減囹圄皆空尋進貴州左布政節省帑銀六萬兩憫滇黔道險風濤飄溺製飛緮鎔鐵橋以通往來四省道里遼闊洞猺劫掠行旅家民築連雲等十一城修山路千餘里崇徵庚辰入覲召對

賜金帛叙平黔功推宣大巡撫以年老乞休子潮遠官

漳州都督

康熙府志

王納諫字聖俞江都人萬曆癸卯鄉試第一時陶望齡主試王思任分校得人稱最盛丁未成進士授行人出使榮藩辭樂郤餽榮世子敬禮之以疾假歸家居二載吏部司官缺人爭營之尚書某曰吾知有下帷著書不干進者王君可任也起爲吏部主事力疾赴召五閱月歷四司疾益甚復請告歸田里匝月而逝所著四書註學者皆宗之子玉藻崇徵癸未進士

康熙府志

張伯鯨字繩海江都人萬曆丙辰進士歷知會稽歸安

江都縣志 卷一四
鄞三縣崇徵初稍遷戶部主事出督延平二鎮軍儲自
黃甫川西抵寧夏千二百里不產五穀芻粟資內地
蘭山東抵花馬池素沃野亦荒蕪甚伯鯨疏陳其狀
通商惠工轉菽麥又倣邊商中鹽意立官市法以招之
軍民稱便盜起延綏伯鯨叅巡撫籌畫俘獲渠魁不沾
泥遂擢兵備僉事又破斬賀思賢一座城金翅鵬等巡
撫陳竒瑜上其功進右叅政及竒瑜遷總督遂擢伯鯨
右僉都御史代之伯鯨涖延綏久視民若子以拾遺論
罷民大失望尋論功起用召爲兵部添設左侍郎攝尚
書事以疾乞休南還福王立伯鯨家居不出

國朝順治二年大兵南下圍揚州與史可法分城固守城

破自經死 本傳

按志伯鯨妻韓氏冢婦郝氏俱及於難

朱希禹字砥中江都人萬曆間以貢入太學授新昌令
民桀驁難治希禹不事鞭笞一以至誠化民踰年民大
悅服以勞瘁致疾不起卒之日邑人罷市比喪歸擁輻
送者幾萬人 康熙府志

倪啟祚字允昌江都人萬曆己未進士改庶吉士授編
修同館姚希孟顧錫疇皆重之天啟間送闈魏忠賢
虐善類啟祚方在告聞之憤甚草疏論其奸狀會遘疾

江都縣志 卷十四
不果上旋卒

康熙府志

俞都美字士中江都人由廩例入太學授安州州同

瘠而多水都美爲治隄梁歲饑捐俸以賑稱定興縣家
嚴絕苞苴時客氏子弟狂橫里中以幣交都美毀刺笞
其使聞者危之隨乞休歸草衣蔬食不干俗事惟雪髯
飄然往來里巷間清介逼人時人稱其居官不媿長孺
林下宛似淵明年六十七而卒

康熙府志

姚思孝字永言江都人崇徵戊辰成進士改庶吉士授
兵科給事中卽首陳保固民心一疏言甚剴切又疏糾
輔臣奪情罷歸後起太僕寺卿尋晉大理寺卿丁父艱

返里思考在諫垣前後上八十餘疏皆昌言讜論時望

歸重焉

康熙府志

車從軾字五車江都人以明經授太平府訓導郡值兵
變御史毛九華委從軾守陴禦敵動中機要兵燹之後
修文廟樂器及補輯尊經閣藏書課士從軾皆預有力

焉

康熙府志

閻汝梅字和陽布政使士選子也崇徵辛未成進士卽
署門自戒不預外事授陽穀令居官清慎推刑部主事
初汝梅舉於鄉時知府劉鐸以詩觸魏閻被逮人莫
往汝梅獨省焉鐸貧爲緹騎所窘歸質口餘金以贈又

江者鼎志 卷一四
勸紳士爲助有願輸金不書名者汝梅曰有不測我
獨任之奚慮焉其忠直天性然也 康熙府志

徐葆初字元赤江都人崇徵甲戌進士例授部主事以
親老乞改南工部時流寇燬鳳陽陵寢尅期復建估費
四十餘萬金工部尙書劉定國疏薦葆初督工役未三
載竣工止費二十餘萬金朝廷嘉其廉幹擢本部郎中
康熙府志

鄭元勳字超宗先歙人家江都崇徵癸未進士以母老
家居甲申三月聞變痛哭出家資募勇俠貽書當道謂
宜建大帥統精銳以守河北會福王立興平伯高傑鎮

揚州傑與元勳有舊揚民喧傳元勳招傑來必蹂躪我
因閉城拒之傑怒縱兵掠城外將攻城元勳單騎入傑
營曉以大義傑爲心折曰前事特別將楊成爲之耳出
禁令退舍且誅楊成而揚民則誤傳爲揚城矣時巡撫
黃家瑞等會議於南城樓揚民洶洶持杖環列元勳至
下馬就坐爲言城外事由楊成語未畢而聞者遽升樓
攢刃害之督師史可法斬倡亂者三人頭以祭元勳逾
三日有兵部職方之命而元勳已及於難時年四十七

二 李清鄭職方傳

傳又曰元勳年二十一舉天啟甲子應天鄉試第

六人時弟元化子爲虹生甫彌月一姬抱而前曰
昨得異夢他年小郎君當與主同作忠義進士
其詳姬不復言至崇徵癸未會試元勳始與爲
同榜後元勳遇害爲虹亦以監察御史巡視仙霞
關殉難姬所云果驗焉

國朝陳卓字懋修江都人順治丁亥進士由刑部郎遷四
川提學僉事時蜀新定諸生文業荒廢卓出所攜經籍
令傳寫轉相教授由是文風日振按試保寧府值劇賊
劉文秀猝至卓乘城分守拒却之叙功擢陝西臨鞏道
副使復官商分茶之法辨部民受逆徇僞劄者民咸德

之再擢湖廣上荆南道叅政告歸卒祀鄉賢

李宗孔字書雲江都人父濂性孝友爲諸生有文名宗
孔登順治丁亥進士由部郎授御史改給事中晉吏科
都給事中疏前後四十餘上皆關吏治民生每同九卿
奏事侃侃直言不阿不附後請假回籍康熙三十八年

聖祖閱河南巡晉秩大理寺少卿

御書香山洛社額以寵異之子錦鑰孫夢昂同聲皆先後登

科第

孫自成字物皆江都人順治丁亥進士知福建歸化
時閩廣初平旁邑多爲賊壘自成蒞任數月招徠七

十餘寨民得以休息事耕桑焉歸里遇山中利弊秉公直言所著賦役管窺一帙條分縷晰尤爲切要至今江都田賦者必採擇之

張問達字天民江都人明末爲諸生值史可法守揚州高傑以鎮將欲屯兵城內問達詣軍門力陳不可且曰封疆至重公不可以畀賊可法怒其阻撓逮至瓜洲將按以軍法有龔克初者從旁大呼曰此壯士不可殺可法遂召入論時事改容謝之康熙五年舉順天鄉試適科臣奏撤揚州兩東門城垣部議問揚人問達執不可乃止尋署休寧教諭遷知趙城縣多善政罷歸以講學

終老問達於克初死後刻木主春秋祀之一日忽取生平所讀書并木主焚之曰吾子孫不能讀吾書又安能祀吾友耶是夕無疾卒

鄭爲旭字方旦本歙人世居江都父元化積善行義爲旭順治辛卯拔貢授中書遷工部主事權廣東太平橋稅減耗恤商擢監察御史巡視東北兩城多所建白如選官須加驗看視學應遣詞臣申講讀律令之條以厚民俗分進士舉貢援例班次以疏銓政飭臬司遇命案不得率結罪人發烏喇減等者卽中途遇赦并在部結諸人皆應照例寬恤等疏俱次第舉卒祀鄉賢

郭礎字石公江都人順治壬辰進士授戶部主事監臨清倉權蕪湖稅俱有聲出知順德府府東北有古大歲漲爲田廬害礎至先挑牛尾河三百餘丈漸濬大郭黃楊諸口自是夏無橫溢其水可灌田數萬頃邢臺南和各邑皆賴之又修學宮備祭器時與諸生課文藝焉郭士璟字眉樞江都人父茂英歲貢生士璟順治乙未進士改授常州府教授常士以逋賦株連被黜者甚夥士璟按名清查得實爲免數百人擢助教遷工部主事權九江關鈔差竣乞歸杜門却掃惟與故友數輩論文賦詩以老士璟素孝友有餘俸分給兄弟及族人貧乏

者幼年初不事舉業以五經三傳二禮三史及莊列淮南越絕書爲日課年二十始爲應舉文一落筆輒高人數等晚年親課子弟著作益多有雜體詩文十七卷子元鈺別有傳

金懷玉字式如江都人順治戊戌進士授福建泉州府推官時海氛未靖沿海州邑數十里外築墻爲界有踰墻出者以通海論懷玉至錄釋繫獄千餘人白上官曰此不過小民資漁利爲活者保無他也後數年弛禁咸服其得政體遷瑞州府同知

高凌雲字尺木江都人少補諸生家甚貧假館授徒赴

江都縣志 十一
日歸省其家必從籬外聽聲息然後入。妻子之饑且斃也。後窮益甚。處之泊如。益攻苦。登順治戊戌進士。嚴州府推官。折獄平恕。人稱長者。旋告歸。閉門課子。與後進講舉子業。決科驗如筮卜。士林服之。子天驥。康熙辛酉舉於鄉。官山陰知縣。鄭爲光字晦中。本歙人。世居江都。父俠如。明末官工部司務。有才能。爲光登順治己亥進士。改庶吉士。授監察御史。巡視中城。能禁強橫。出冤獄。以州縣賦稅叢弊。請設循環簿稽之。剔揚州關鈔積弊。及請科舉廣額。收推升實效。節鳳米浮費。諸疏皆報可。卒於官。祀鄉賢。

劉梁嵩字玉少。江都人。幼傳其父有綸之學。有文名。中康熙甲辰進士。授江西崇義知縣。甲寅賊犯崇義。孤城無援。嵩募義勇。身先士卒。登陴固守。擒賊七十餘人。城得不陷。境內以安。以勞瘁卒於官。

許承宣字力臣。江都人。康熙丙辰進士。改庶吉士。授工科給事中。首陳揚州水利賦役二疏。辛酉典陝西鄉試。還京條秦晉間利弊六事。上之。并請刊

御製文集及廣捐修學宮之例。悉見嘉納。後假歸。卒於家。

正五年五月我

皇上舉承宣向所上水利一疏。傳問揚人之。京師者旋丁

江南督撫酌行之先是承宣父明賢倅以多才畧兄承宗善繼父志視兩弟承宣承家無異財乞以專心力一門以內人稱孝友今明賢與兩子并祀鄉賢

汪楫字舟次先世休寧人遷江都補儀徵諸生官贛榆教諭康熙己未薦舉博學鴻儒授翰林院檢討與修明史旋充冊封琉球正使條使事七條以行既至宣示

天朝威德爲其國撰孔子廟碑默識尚氏世次撰中山沿革志上之以才略出知河南府置學田於嵩陽書院聘詹事耿介主之陞福建按察使布政使治績尤著內擢京卿途次得疾卒於家祀儀徵鄉賢所著有悔齋詩山聞

正續集

張瑾字去瑕江都人康熙癸卯舉於鄉除知雲南昆明縣時吳逆初平民未復業瑾爲給牛種招墾荒地請開白沙清水馬裏三河灌之又於近郊三十里令民種桑柘民資其利聽訟片言立折案無留牘諸上官廉其才守凡他郡有疑獄不決者悉下瑾理之滿三載將行取卒於官百姓哀號送其喪者數萬人復請祀昆明名宦江都亦祀鄉賢瑾居家篤於天性同弟琬事母孫氏以孝與琬相友愛嘗上公車宿旅店夜半忽大哭同寓怪問之瑾曰適夢見吾弟共侍母側乞思之不禁哭

失聲也琬字子琰邑廩生中康熙壬子榜以文名於時

論曰玉生於崑岡珠產於丹淵山輝川媚天地能掩者惟其真也江都人物自漢晉迄今蔚蔚炳炳立德立功立言之士後先接武見諸史傳志乘者美不勝書不啻玉之崑岡珠之丹淵矣朝璣承乏茲邑欽奉

聖天子明詔編輯一邑之志伏讀

聖諭嚴切申重飭令地方有司確查人物據實秉公用彰直道爰夙夜惶懼屏絕私情諮諏輿論以仰荅

我

國家彰善旌賢之典務使美玉明珠精光煥發而幽遐寂寞之寶不湮沒於人間則表微闡隱唯兢兢然致覈其真也若其見聞弗廣搜羅未徧以及現在名流功名事業蒸然騰上不敢限以目前姑以俟諸異日亦惟士大夫諒之而已

江都縣志卷之十四終

